

國朝耆獻類徵初編卷四百六十九目錄

隱逸九

劉若金

羅聞朝

耿華國

顧朱

謝泰宗

從弟泰臻
辭五玉

泰階
鄭維馨

艾仲可

李國標

王正中

文枏

陳子升

王孫蕃

朱顯宗

王來咸

朱羽南

胡躍龍

陳祐

卞煥文

補錄

陳子升

國朝耆獻類徵初編卷四百六十九

通奉大夫前署江西巡撫江西布政使司布政使湘陰李桓輯
隱逸九

劉若金

雲密劉公名若金潛江人天啟乙丑進士起家縣令歷監司忤時
拂衣以正氣名聞天下崇禎末一再膺薦後驅馳閩海閒官至大
司寇見政柄已下移知事不可爲卽堅乞骸骨以歸自號蠡園逸
叟康熙乙巳卒年八十公於書無所不讀而尤篤嗜軒岐之學自
謂雖古人之好鍛好屐不是過探賸返約竭三十年之心力屬筆
者八十餘萬言成本草述其曰述者本經合論曲鬯旁通以明夫

不居作者然實能辨別本草稟受之性以窺陰陽之奧而得其合
同而化之原並採諸家方論權衡而上下之卽世所奉爲金科玉
律如李瀕湖之本草綱目亦時有去取焉夫具經濟才值槃錯時
歸歟投老葆天真而銷歲月區區者僅寄情於方書而他無表著
方書傳矣公不徒死而卒莫挽於徒生天實爲之可勝慨哉

右傳唐思忠撰

羅聞朝

秦和羅處士沒其子若孫以行狀請銘夫諛墓非古也然處士抱道以沒潛德不彰亦吾儒之責也於是謹按狀志之狀曰公諱聞朝字泰亨父蓮池祖後山曾祖碧潭皆文學世有隱德號稱理學淵源考羅氏自春秋時伯嘉實出有熊之苗裔國在楚宜城兩徙支江長沙閒傳至羅含官晉世祖太康中給事含傳至艘從桓宣武伐蜀有功擢知襄陽府事因家襄陽傳至宏信官唐憲宗時節度使遷太師進爵臨清郡王子紹威襲封長沙郡王數傳至恭官文宗開平中金陵太守又家金陵傳至宗勳官武宗會昌中殿前都指揮使贈太保徙江州傳至琉官昭宗時光祿大夫由南昌徙

廬陵壤下後傳道徙泰和子三人洞霄洞晦洞天晦官南唐端明
殿大學士霄天同舉進士傳朝偉官至元給事中傳尙英徙界溪
英傳永達及碧潭其家世代有顯者處士生而靈穎端慤五歲如
巨人岸然自異不與羣兒伍見者奇之讀書目過不忘從前輩廖
涪初養泉學天質旣優學力綜覈含毫吮墨頃刻千言一時聲譽
藉甚然志在經世凡兵刑禮樂及天官地理稗官野志風角諸書
尤加考證初試童子例自負倚卓卽拂衣出曰朝廷待士固自有
體乃竟同星卜舉止耶遂絕意仕進惟窮經授徒爲業講學戴氏
里從遊者日益眾因材誘掖多所造就嘗誨子弟曰吾人學問上
之聖賢次之豪傑再次文章然文章必先行誼苟不端心術莫辨

利義徒以入股博上第踞要津其人不足稱也苟忠孝不虧衾影
無愧衡門泌水讀書樂道亦自可傳耳生徒貧者不問脩脯更急
其有無授徒四十餘年無長物嘗得館穀若干攜歸爲俯仰計途
遇難者卽傾橐濟之其生平慷慨多類此公孝友性成父沒哀慟
毀形水漿不入口三年芻塊啜粥不茹酒葷遇生忌之辰則涕泣
不食族里咸以孝子稱其餘睦族里如一父之子窘乏者婚喪疾
病患難無不振助至典器鬻物不止卽悠悠陌路以困阨來告亦
盡力以濟無瞋無倦喜爲人排解里有忿爭不下者片言剖釋公
剛方無愆故人多德之與人談皆稼穡艱難水旱災傷宜家應世
之法功過感應之事無褻語也大至古今興衰治亂歷歷若指掌

聽者忘倦閒及節烈奇偉之行則擊節稱快其屈枉不平之事則切齒不休善善力而惡惡嚴故善者日親惡者日遠未嘗不默爲感化也兄永春守會稽頻以書招公公不欲以貨取竟不往崇禎中詔行保舉公不欲以虛聲誤國事亦不就舉鄉飲者再皆堅辭未赴明末吉顓等郡流寇蹂躪公素精兵法風角乃團練族里弟子勒步伍爲扞禦大破賊於界溪閒有渠魁曹賊號梟獍攻掠暴至族里驚竄公以大義曉之曰汝等平日忠憤何在茲賊勢壓境須決死戰滅此朝食乃竟效兒女子態乎吾歷世忠義棄祖宗廬墓何以生爲誓死不去然從公者甚少又皆怯敵公憤呼曰賊貪子女玉帛實無戰心我利甲兵堅壁壘具有死無生之志滅賊必

矣兵法用奇貴少貴精安用怯也於是命次子應培擊其前鋒提
百斤巨刃衝突中堅所殺過當賊爲披靡散而復合四面交敵公
令眾登屋飛瓦石自辰至申殺賊無算應培更斬紅旗首二級隻
手提屍揮賊賊爲駭散迄今界溪墳廬無毀戶口猶存圖史守器
皆完好公之力也性耽山水勝情兼具贏糧負笈不憚寒暑覽故
廬之東東山之麓岡巒環抱隱然如谷遂名曰東谷構亭貯書鑿
池種荷移竹植樹手自經營恆葛衣烏巾箕踞青松白石閒作梁
甫吟陰晴雨雪皆日至焉攜諸孫采花果口授詩詞相和答爲樂
飲酒日可一石未嘗酒失讀書浮白信口作詩多不屬草與同族
葵陽玉壺伯園輩互相倡和嘗手錄陶詩於壁自況晚年謝客曰

窮研性理於周程張邵朱陸之書槩其羅氏端明洞晦文質從彥
博士泌文毅倫文莊欽順中丞欽忠祭酒環修撰珵參政汝芳文
恭洪先給事大紘諸理學之言參考得失體會於心實踐於事毅
然以斯道爲己任時以大儒目之滄桑旣更絕迹城市次子偶被
橫逆公自反順受未幾暴虐者罹禍人謂公至誠所感云以疾正
寢於家誠子孫曰吾儒守身爲大汝曹宜讀書行善以古人爲法
言訖而逝享年七十有三生萬厯二十二年甲午九月卒康熙五
年丙午五月公方面修髯聲洪目炯器宇宏偉儼若神人端凝吉
藹與物無競殆遯世無悶者乎卒之日里人至下涕者其感人深
矣葬仁善鄉湖舍之陽配本邑劉氏恭儉慈愛以淑德聞先公沒

子二女一女適郭某子長子應垣娶郭氏生孫五宏治宏啟宏肇
宏哲宏化次子應培娶蕭氏生孫三宏斐宏旻宏雯孫女一爲之
銘曰

負材而隱抱道而終不忤不愧君子時中高山仰止其德可風

右墓誌銘王岱撰

耿華國

公姓耿氏諱華國字首岳襄城人邑庠生汝元公之次子也公天姿警敏讀書有卓識幼從師受舉子業嘆曰聖王治世淑人甯區區恃此乎遂博覽羣籍潛心研究不爲章句之學年二十二爲學使者首拔補儒官弟子員俄食廩餼至崇禎九年丙子循次貢於成均是時公年已五十七矣當公之初入庠也伯兄悉以家事委之踰歲父汝元公卒母馬氏病瘍危篤兩弟皆幼其季者方離襁褓公以養以教門以內轆轤參錯有難爲言者而所居則比鄰巨室蠶食鯨吞無虛日公以一身措擲其間幹蠱禦侮幾二十年所迨諸弟授室遊膠庠公謂可息肩而又值流寇之亂蒼黃戎馬播

遷於覃懷山谷閒計公半生所處大都茹荼嘗膽之日居多云先是伯兄欲析產公泣諫不能挽則自取瘠薄者而以負郭田園盡讓諸弟其他宅舍車馬金帛什器諸物皆類是亂既定公始自河北歸里適部檄至催赴銓選公嘆曰吾以守城不下嬰賊怒致割鼻耳今已殘廢可出爲當世用乎不赴因自號爲首陽子自此杜門謝交遊益肆力於書自經史諸子百家之言無不讀讀而無不求得其精髓晚更喜易朝夕不釋手嘗曰道賅於易萬古不遺凡人不可不知也卽天有定數人不能違而數有其幾知幾爲良君子知幾先天而頤後天而解在泰不愆在否不陷可不學乎又曰吹息直達於六合惟至不一也萬物賅存於幾微惟至一也以至

一者測之推無不準以至不一者測之神無不周作周易辭又作
氣運造化日月陰陽等說數十篇明天人之故綜古今之通深奧
宏博邑人崔璋謂與正蒙皇極經世相表裏將老又作論語正意
二卷藏於家以康熙五年丙午秋七月卒年八十有七公以母病
治素問靈樞久之得其元微爲人製方無不奇中世以比朱丹溪
邑人萬邦孚嘗病不寐歷數十醫莫能效然每發公輒能已之適
予與邦孚方省試聞公訃音邦孚驚曰公去吾能生乎因大痛哭
予所得於目覩者如此其於青烏家言亦有獨得鄙術士之妄謬
辨析甚精然不冒爲人相墓也

李來章曰來章幸得數侍公嘗一日坐來章於階上謂之曰讀書

不可不勤苦予昔篝燈夜讀聞簷溜間雀聲啾啾方知天曙然今人所操以求科第者皆市井炫鬻術耳不足爲子期也吾儒更向上事在幸勿自畫來章又聞父老言公當守城日每出輒冠儒冠縛袴乘馬從奴持雙戟於後旁觀者相竊指以爲此公雅擅文章不意於武事亦矍鑠雄偉如此皆嘆服以爲不可及云

右傳李來章撰

顧朱

古人稱立德立言立功爲三不朽立德莫重於節義立言莫大乎文章二者皆人可自主獨至功名之際則有幸不幸焉蓋可爲者人也不可爲者天也陶靖節不屈身異代名節皎然然而江州之酒不辭始安之錢不拒絕無損其高致謝疊山安仁之敗以老母不死使其不見逼迫則黃冠終老豈遂出文丞相下乎故節義之說未可一律定也道之顯者謂之文自俗失土壤不識制舉外更有何事豈知六經者文章之祖也有真經術方有真事業即使天心已去國運垂傾其所施設必有超出尋常萬萬者雖壯志未伸而丰采已略見於天下矣如語溪顧自公府君是也府君諱朱年